

DOMINGU II PÁSKUA – TINAN A

(Domingo da Divina Misericórdia)

Tema

Liturjia domingu ne'e nian apresenta mai ita comunidade Ema Foun sira nian ne'ebé moris husi Jezús nia krús no resurreisaun: Igreja. Nina misaun mak hatudu ba ema sira moris foun ne'ebe mosu husi resurreisaun.

Iha *leitura dahuluk* ita iha, “fotografia” comunidade sarani Jerusalém nian, trasu sira comunidade ideál nian: comunidade fraterna, preokupa atu koñese Jezús no ninia poposta salvasaun nian, ne'ebé halibur hamutuk atu hahí Na'i iha orasaun no Eukaristia, moris iha partilla, iha doasaun no servisu no fó sasin – ho jestu konkretu salvasaun ne'ebé Jezús mai propoin ba ema no ba mundu.

Iha *Evanjellu* ideia ida maka'as liu mak Jezús ne'ebé moris no moris-hi'as sai sentru comunidade sarani nian; comunidade estrutura an hale'u Nia no husi Nia mak comunidade simu moris ne'ebé anima nia no fó kbiit atu enfrenta difikuldade no persegisaun sira. Husi sorin seluk, iha moris comunidade nian (liturjia, domin, sasin) mak ema sira hetan prova katak Jezús moris hela.

Leitura daruak fó hanoin ba membru sira comunidade sarani nian katak identifikaun ho Kristu – iha Ninia saran an tan domin ba Aman no ema sira – sei lori fiar-na'in sira ba moris-hi'as. Nune'e mak, fiar-na'in sira simu konvite atu tuir dalan ho esperansa maski hasoru difikuldade no mundu nia rai-kunan, ho matan fihir metin iha orizonte salvasaun definitiva nian.

LEITURA I – Apóst. 2,42-47

Haktuir tiha Espíritu Santu ne'ebé tuun ba dixípulu sira halibur iha senákulu (kf. Apóst. 2,1-13) no apresenta rezumu sasin kona-ba Jezús (kf. Apóst. 2,14-36), Lucas refere rezultadu husi apóstolu sira-nia pregasaun: ema lubun boot adere (Lucas temi ema rihun tolu) no moris mai comunidade sarani Jerusalém nian (kf. Apóst. 2,37-41). Ne'e mak ain-hakat dahuluk Jezús nia Kreda nia dalan husi Jerusalém ba Roma (mundu antigu nia sentru).

Ita-nia testu mak parte sumáriu tolu, kona-ba aspetu fundamentál vida comunidade sarani Jerusalém nian. Sumáriu dahuluk dedika ba tema unidade no moris sarani nia impaktu ba povu sidade nian (sumáriu rua seluk kona-ba fahe rikusoin – kf. Apóst. 4,32-35 – no Kreda nia sasin liuhusi atividade apóstolu sira-nian ho milagre – Apóst. 5,12-16).

Sumáriu ne'e la'ós retratu istóriu ida kona-ba comunidade nia inísiu iha tinan 30 (maski iha base istória). Lucas hakerek iha tempu ne'ebé sarani sira hahú moris iha monotonia, lakon entuziazmu tanba hein Na'i ne'ebé la fila hikas mai. Lucas hakarak fó hanoin kona-ba buat ne'ebé esensiál esperiéncia sarani nian no haktuir karakterístika comunidade nian.

MENSAJEN

Sá loos trasu comunidade ideál moris husi Espíritu no apóstolu sira nia sasin?

Uluknanai, comunidade ne'e comunidade “maun no biin-alin sira nian”, moris iha komuñeun fraterna (vers. 42). Fraternidade ne'e mak rezultadu identifikaun ho Kristu nia moris ne'ebé anima fiar-na'in ida-idak – membru isin ida de'it – Kristu nia Isin.

Daruak, comunidade ida badinas tuir apóstolu sira nia hanorin, haka'as an atu koñese no moris tuir proposta salvasaun mai husi Jezús ne'ebé apóstolu sira hatutan (no la'ós husi mestre falsu sira). Katekeze tenke foka Jezús, Ninia valór sira, Ninia moris saran An nian. Sentidu fundamentál moris nian mai husi obediénsia ba Aman nia planu no entrega ba maluk sira; moris nune'e, maski liuhusi krús, lori moris-hi'as no moris nakonu.

Datuluk, comunidade sarani mak comunidade ida ne'ebé selebra liturjikamente nia fiar. Lucas hatudu momentu selebrativu fundamentál: “fahe paun” no “orasaun”.

“Frasaun paun” nian parese espresaun téknika ida atu hanaran memoriál “Na'i nia Han-Kalan”, ka “eukaristia”. Selebrasaun ne'e haktuir fali Na'i Jezús nia moris tomak, saran An to'o mate. Baibain akompaña ho han hamutuk iha fraternidade, hamutuk iha orasaun sira, pregasaun no mós jestu sira komuñau no partilla nian entre sarani sira. Momentu ida ksolok nian iha-ne'ebé comunidade selebra uniaun ho Jezús no husi ne'e mai komuñau fraterna.

Kona-ba “orasaun”, sarani dahuluk kontinua frekuenta Templu (vers. 46) no partisipa iha orasaun comunidade judaika; maski nune'e, comunidade sarani sente nesesidade atu hasoru malu iha orasaun sarani, ho Jezús nu'udar sentru; no katak, ne'e mak orasaun komunitária sarani ne'ebé Lucas refere. Nune'e comunidade sarani halibur malu atu harohan, atu hahí ninia Na'i.

Dahaat, comunidade sarani mak comunidade ne'ebé partilla rikusoin. Husi komuñau ho Kristu mai komuñau entre sarani sira. Iha konkretu, implika hakribi egoísmu hotu, autosufisiénsia, sai husi an no loke fuan ba partilla, ba domin: “sira iha buat hotu iha komún; sira faan sira nia propriedade no soin no fahe osan ba ema hotu, tuir nesesidade ida-idak nian” – vers. 44-45).

Ikusnian, comunidade ida ne'ebé fó sasin. Apóstolu sira nia jestu hakonu ema ho hamta'uk (vers. 43) katak, habelar iha ema hotu serteza katak kona-ba Maromak nia prezensa no dinamizmu salvasaun nian. Aleinde ne'e, sira nia piedade, domin fraternu, ksolok no simplisidade provoka povu nia admirasaun no simpatia; sira-nia modu moris nian interpela makhorik Jerusalém nian no haboot número ema sira ne'ebé adere ba Jezús nia proposta no ba comunidade salvasaun nian (vers. 47).

Lucas iha ninia deskrisaun kona-ba comunidade ideál ne'e, fó hanoin ba sarani sira katak ida-ne'e mak tenke sai modelu ba Igreja no igreja sira tempu hotu nian.

LEITURA II – 1 Ped 1,3-9

Surat dahuluk Pedro nian mak surat ida dirije ba sarani sira provínsia romana lima Ázia Menór nian (Bitínia, Ponto, Galácia, Ázia no Capadócia – kf. 1 Pe 1,1). Autór apresenta an ho apóstolu Pedro nia naran; maski nune'e, análise literária no teolójika la konfirma katak Pedro mak autór testu ne'e nian: kualidade literária surat nian la korresponde ho maneira hakerek peskadór tasi Tiberíades nian; teolojia ne'ebé hetan iha surat nia laran hatudu reflesaun no katekeze ida mai depoizde Pedro nia tempu; no “ambiente” haktuir iha surat laran korresponde ho situasaun comunidade sarani iha finál sékulu I. Se Pedro mate iha Roma durante persegisaun Nero nian (iha tinan 67), nia labele sai autór hakerek ne'e nian. Autór surat ne'e nian mak sarani anónimu matenek ida – provavelmente responsavel comunidade sarani ruma – no koñese ho kle'an situasaun comunidade sarani sira iha Ázia Menór. Nia hakerek iha finál sék. I (no la'ós molok tinan 80).

Destinatáriu surat ne'e nian mak comunidade sarani sira ne'ebé moris iha zona rurál Ázia Menór nian. Maioria husi sira mak bibi-atan eh to'os-na'in ne'ebé halo ema riku klase dominante nia to'os. Ema sira-ne'e moris iha meu rurál ho ekonomia ki'ik, no fraku hasoru ambiente ne'ebé hahú hatudu ostilidade ba kristianizmu.

Autór surat nian koñese provasaun sira ne'ebé sarani sira terus lora ba lora. Nia husu sira atu mantein fiél iha fiar, maski hasoru difikuldade. Autór mós konvida atu hateke ba Kristu, ne'ebé liu mós husi esperiéncia paixaun no krús, molok tama iha resurreisaun; no husu sira atu mantein esperansa, domin, solidariedade, hodi moris iha ksolok, koerénsia no fidelidade ba opsau sarani.

MENSAJEN

Testu ohin nian mak agradesiemntu ida, tuir estilu bensan judeu sira-nian. maski nune'e, hahú kedas atu apresenta tema prinsipál ne'ebé sei desenvolve iha surat laran.

Autór fó hanoin ba fiar-na'in sira katak, hodi batizmu, sira identifika an ho Kristu; ne'e signifika katak, moris foun hanesan Kristu nia moris-hi'as sai modelu no sinál. Konxiente katak Maromak oferese salvasaun ba sira ne'ebé identifika an ho Jezús, fiar-na'in sira moris iha ksolok no esperansa: sira hatene katak – buat sá de'it mak sei akontese karik bá – Maromak rai hela ba sira moris nakonu no definitivu;

Loos duni, katak fiar-na'in sira nia dalan iha istória mak esperiéncia terus nian, provasaun nian, persegisaun nian. Terus ne'e hotu mak “prova” ida, atu purifika sira-nia fiar, hamoos husi interese laloos no habiit fiar ne'e; liuhusi prosesu ne'e, hodi Espíritu nia kbiit, fiar-na'in sei nakfilak an to'o identifika an ho Kristu no to'o ba moris nakonu (hanesan osan-mean tenke hamoos ho ahi molok sai nabilan).

Apelu boot autór surat dahuluk Pedro nian mak ne'e: ita buka identifika an ho Nia ne'ebé ita hadomi maski la haree (Kristu) – ho ninia saran an tan domin ba Aman no maluk sira – atu hamutuk ho Nia, ita to'o ba moris-hi'as.

EVANJELLU – Jo 20,19-31

Ita kontinua ho parte daruak Evanjellu João nian, iha ne'ebé apresenta mai ita comunidade Aliansa Foun nian. Indikasaun katak ita iha “lora uluk semana uluk nian”, dala ida tan, halo referénsia ba tempu foun ne'ebé Jezús lori mai ho ninia moris-hi'as, tempu kriasaun foun nian.

Komunidade ne'ebé moris husi Jezús nia obra halibur hela iha senákulu, iha Jerusalém. Komunidade ne'e laran-surar no ta'uk, haleu ho funu-balu sira. Sira-nia ta'uk ne'e tanba sira seidauk halo esperiéncia Kristu moris hi'as nian.

MENSAJEN

Testu ne'ebé propoin mai ita fahe ba parte rua lahanesan.

Parte dahuluk (vers. 19-23), haktuir Jezús nia “mamosuk”/aparisaun ba dixípulu sira, Haktuir tiha situasaun inseguransa no fragilidade comunidade nian (rai nakukun, odamatan taka metin, ta'uk), autór apresenta Jezús iha comunidade nia “klaran” (vers. 19b). Hodi mosu “iha sira nia leet”, Jezús asume nu'udar pontu referénsia nian, fatór unidade nian, uvas-hun ne'ebé ho sanak sira. Komunidade haleu Jezús, basá Nia mak sentru no iha Nia mak hotu-hotu ba hemu moris ne'ebé halo sira manán “ta'uk” no mundu nia rai-kunan.

Ba comunidade ne'ebé taka an, ho ta'uk, falun an iha nakukun mundu ida ne'ebé rai-kunan, Jezús tranzmite dame ba dala rua (vers. 19 no 21: ne'e mak “shalom” ebraiku, iha sentidu armonia nian, serenidade nian, hakmatek nian, konfiansa nian, moris nakonu nian). Dixípulu sira hori ohin ba oin sei la iha tan razaun atu ta'uk, tanba Jezús manán tiha buat ne'ebé sira ta'uk (mate, opresaun, mundu nia hirus).

Hafoin (vers. 20a), Jezús hatudu ninia “identidade”: iha nia liman no iha nia sorin ne’ebé sona boros, ita hetan sinál sira nia domin no saran an nian. Iha sinál domin no saran an nian mak comunidade rekoñese Jezús moris no presente iha nia leet. Haree “sinál” sira ne’ebé hela metin nafatin iha Jezús, hatudu Jezús nia domin ne’e hela metin nafatin: Nia mak Mesias ne’ebé hadomi no husi nia suli bee no raan ne’ebé harii no habiit comunidade.

Tuirmai (vers. 22), Jezús “huu iis” ba dixípulu sira haleu Nia. Verbu uza iha-ne’e mak verbu hanesan ho testu gregu Gn 2,7 (bainhira hateten katak Jezús huu iis ba ema tahu nian, hodi fó ba nia Maromak nia moris). Ho “huu-iis” Gn 2,7 nian, ema sai ema moris; ho “huu-iis” ne’e, Jezús tranzmite ba dixípulu sira moris foun ne’ebé halo sira ema foun. Oras-ne’e, dixípulu sira soi ona Espíritu, Maromak nia moris, atu bele – hanesan Jezús – fó an ho laran-luak ba ema seluk. Espíritu ne’ebé harii no anima comunidade Jezús nian.

Iha parte daruak(vers. 24-29), autór apresenta katekeze ida kona-ba fiar. Oinsá mak ema to’o ba fiar iha Kristu ne’ebé moris hi’as?

João hatán: ita bele halo esperiénsia fiar nian iha Kristu moris no moris-hi’as iha comunidade fiar-na’in sira-nian, katak fatin naturál iha-ne’ebé manifesta no naksira Jezús nia domin. Tomé representa sira ne’ebé taka an rasik (iha li’ur) no la interese ba comunidade nia sasin, la haree mós sinál sira moris foun nian ne’ebé hatudu iha comunidade. Envezde integra an no partisipa esperiénsia hanesan, nia buka atu hetan demonstrasaun partikulár Maromak nian.

Tomé, ikusmai, halo esperiénsia Kristu moris hi’as nian iha comunidade nia laran. Tanba sá? Tanba iha “Na’i nia laron” nia fila fali ba comunidade. Ne’e mak aluzaun momoos ida ba Domingu, laron ne’ebé comunidade halibur hamutuk atu selebra Eukaristia: iha enkontru ho domin fraternu, ho maun-lain sira nia perdaun, ho Liafuan ne’ebé haklaken, ho paun ne’ebé fahe ba malu, mak deskobre Jezús moris-hi’as.

Esperiénsia Tomé nian la’ós eskruziva sasin dahuluk sira-nian; sarani hotu tempu hotu nian bele halo esperiénsia hanesan.